



المجلس القومي للمرأة
THE NATIONAL COUNCIL FOR WOMEN

تأثير الماضي التغيير



مرغبات
لبناتي



التمس على
15115
للحصول على الدعم القانوني النفسي الاجتماعي

مكتب شكاوي المرأة
أحنا معاكي

عام ٢٠١٦ كان بداية فكرة اتولدت جوا لجنة الشباب بالمجلس القومي للمرأة. فكرة إطلاق مبادرة وطنية للمقبلين على الزواج والمتزوجين حديثا، هدفها حماية الأسر من التفكك والحد من ظاهرة الطلاق التي بدأت تنتشر في السنوات الأخيرة. وخلال احتفالية المرأة المصرية في مارس ٢٠١٧ أعلن السيد رئيس الجمهورية عام ٢٠١٧ عاما للمرأة المصرية وكمنا ناشد الحكومة إنها تتبني مبادرات لدعم الأسرة المصرية . وحماية كيانها .. لأن الاسرة هي نواة المجتمع التي لو صلحت وتماسكت يبقى احنا أكيد هنكون في مجتمع سليم وسوي وفي عام المرأة بدأ تنفيذ برنامج **معا لنبقى** وكان هدفه الأساسي تعميم السلام المجتمعي من خلال إننا نتعلم إزاي نتقبل الاخر مهما كان مختلف عننا لإن الاختلاف بالاساس هو رحمة، وإزاي نستفيد من اختلافنا ونخليه حابه إيجابية ونلحقه قبل ما يتحول من اختلاف لخلاف، واننا نتعرف على نفسنا ونفكر إزاي نحاسب نفسنا قبل ما نحاسب الاخر، نتعلم إيه هي حقوقنا وإزاي نطالب بيها بلطف وحيادية وواقعية ، وإيه هي التزاماتنا وإزاي نأديها ومنقصرش فيها، والمبادرة اتعلمنا فيها برضو يعني إيه حب وإيه هي أنواعه وإزاي تحب شريكك وتوصل له الحب دا بالطريقة التي تسعده مش بطريقتك إنت، اتعلمنا إن أولادنا أمانة في إدينا وإن الخلفة مسئولية مشتركة وتربية الأطفال محتاجه مذاكرة واتعرضنا كمان في المبادرة للمشاكل التي ممكن تحوم حوالينا وحوالين ولادنا منها التمر والتحرش والعنف الأسري التي بنمارسه على بعض من غير ما ناخذ بالننا منه ولا من نتايجه.

الخرس الزوجى كلمة كلنا ممكن نكون بنسمع عنها.. واوقات كثير بنعدى بالتجربة دى ...
طب هوا يعنى ايه خرس زوجي؟

ولو ظهر فعلا فى حياتى اعمل ايه ... وياترى مين السبب احنا الاتنين ولا طرف فينا بس؟!

طب وحتى لو عرفنا الاسباب هينفع نحلها ؟ ليه حل يعنى ولا خلاص دى نهاية اى علاقة ؟
طيب هل الاولاد بيتاثروا بالعلاقة دى ولا لاء ؟؟


اسئله كثيره اوى ممكن تيجى فى دماغنا كل الاسئلة دى هنلاقى اجاباتها فى الفصل دا

بس لازم نكون مؤمنين مبدئيا بالتغيير ... وهنعرف يعنى ايه تغيير وازاى هنقدر نعمله



حكاية ساره و تامر

ساره مش اول واحده تعبت من حياتها و تعبت من احساس الوحدة والفتور اللي في بيتها وجوازها.. وبرضوا هي مش أول واحده تفكر انها عايزه تهرب و تنهي النزيف اللي بيحصل جواها كل يوم بسبب الفشل اللي هي حاسه بيه في علاقتها بجوزها، اللي سارة بتعيشه في بيتها كل يوم هو بالضبط الخرس الزوجي اللي كانت بتسمع عنه وبتشوفه في الافلام ، عمرها ما تخيلت انها هتعيش وتحس الكلام ده في علاقتها بتامر.



شهور و سنين مش بيتكلموا غير في حاجتين:



يا إما تفاصيل ليها علاقه بأولادهم يا إما عتاب و لوم و دايمًا ينتهي بخناقه والخناقه توصلهم لنفس النقطة، و هي ان مفيش امل في علاقتهم واللي يفضلها بعد الخناقه مشاعر الاحباط والفشل والعجز وان مستحيل اللي ما بينهم يتصلح في يوم من الايام.

تامر قرر يهرب وبقي يتجنب الخناقات بحل سحري و شكله حلو من بره علشان يبقي عداه العيب و هو " انا مشغووووووول " و وقرر يستخبي في شغله و حط هدف لنفسه لازم ينجح في شغله، وبقي مكتبه هو مكان راحته، بيستني اللحظة اللي يخرج فيها من البيت علشان يبعد عن وش ساره الوش المكشر والكئيب طول اليوم ، مش بس كده ده كمان بعد يومه الطويل في الشغل بقي يروح يقعد

مع اصحابه علي القهوة .. بيبقي عايز يضمن انه لما يروح هتكون ساره نامت. علشان يتجنب زنها ولومها.

و بكده بقي الشغل بيته الأولاني .. والقهوة بيته الثاني، وطبعًا ساره والأولاد بقو عنده رقم ٣ بعد الشغل والقهوه



ساره كمان طلعت همها في ولادها، درجات ادم ابنها "٧ سنين" في المدرسه بقت درجاتها هي .. بتفرح بيه وبنفسها لما درجاته تعلي، وبتحبط منه وبرضوا من نفسها لما الدرجات تقل .. اراء العيله و تعليقاتهم علي ليلي بنتها اللي عندها ٣ سنين وانها متاخرة في الكلام بقت بتضايقها، وبقت مش مستحمله التجمعات العائليه علشان هي علي آخرها اساساً من تامر.. فمش هيبقي تامر و الأولاد و عيلتها اللي متدخله بزياده في حياتها كمان .



و في سرها دايمًا تكلم بنفسها و تقول مش كفايه عليا سلبيه تامر و خناقتنا في البيت كمان لما اجي وسط عيلتي اللي المفروض يبقي مكان راحتي الاقي تعليقات و توجيهات علي اولادي طول الوقت!!!



خلي بالكم في حاجة مهمة



أدم و ليلي هم انعكاس لحاله ووضع جوازه ساره بتامر ، وكم ان انعكاس لحالتهم النفسية

- **خناقاتهم الكثيره كانت بتوصل لأدم...** وكانت النتيجة انه دائما اقل من اصحابه "صغر النفس" وقله الثقة في نفسه، وبالتالي تركيزه و نجاحه في الدراسه كان انعكاس لحالة البيت .
- **كمان ليلي** اتأثرت بس بطريقه ثانيه، علشان سنها صغير فكانت الخناقات بتترجم عندها بخوف وعدم أمان، وده اللي خلاها تتأخر في الكلام، اه بجد متستغربوش ما احنا ولادنا مرايتنا مهما كان سنهم صغير او كبير .
- **اللي تعب ساره و تامر** أكثر ان كل ما يفتكروا أول تعارفهم وايام الخطوبه، كانوا بيحزنوا أكثر علي اللي وصلولوا.
- **زمان كان تامر** هو اللي بيبادر علشان يقضي وقت مع ساره و يبقي عايزها تقعد تتكلم وتحكيلوا علي اصغر تفاصيل يومها، كان بيحتويها جدا

و ساره كانت علي طول شايفه ومتأكده انها اولويه عند تامر. تامر كمان كان دائما حاسس ان ساره معجبه و فخوره بيه وكانت دائما تقوله انا بظمن وانت جنبي....انت كل حاجه في حياتي.....

بعد اللي هم فيه النهاردة .. منطقي جدا نسأل الاسئلة دي :

- ◀ طيب ايه اللي حصل؟
- ◀ راح فين الإعجاب؟
- ◀ راح فين الحب؟
- ◀ راحت فين مشاعر الأمان؟
- ◀ راح فين التقدير؟



في يوم الساعة ٩:٠٠ بالليل بعد ما تامر رجع من الشغل وبعد ما ساره نيمت الأولاد راحت تقعد قدام التلفزيون شويه علشان تفصل وكان تامر قاعد في نفس الأوضه ماسك موبايله بيتفرج علي ماتش، فضلت ساره تقلب في القنوات لحد ما لقت حلقة لدكتور نفسي مشهور كان بيتكلم عن اسباب فتور العلاقات وفشل الزواج، و ليه فجاء بقينا حاسين ان الطلاق زاد وهل دي حقيقه ولا لاء؟ شدها الموضوع و قررت تسمع، تامر كمان رامي ودانه بس كبريائه منعه انه يقفل موبايله ويبين اهتمامه باللي بيتقال .. بس هو كان سامع كل اللي بيتقال.


المهم اببدأ الدكتور يقول التالي:

ناس كتيره فاكروه ان مشاكلها ابءءء مع الجواز. بس انا في رأي كطبيب نفسي إن الجواز مش هو اللي بييجيب المشاكل .. المشكلة في اللي حصل لكل حد فينا قبل ما يتجوز اصلا .. لأن الجواز هو نتيجة لنضوج شخصيتنا.

يعني هو حصاد لسنين الطفولة والمراهقه ، يعني كل طرف النهارده هو نتيجة لي عدي بيه في حياته.

وشبهه الجواز بالجسر و قال:

ممكن عربيه ثقيله تعدي علي جسر وتلاقي الجسر كله بيتهد، ساعتها مش بنلوم العربية لكن بنفهم ان الجسر كان ضعيف، وعلشان كده مش مستحمل تقل العربية، يعني الجسر اءكروت وكان هش وعلشان كده ماستحملش، احنا كمان ساعات نمونا النفسي بيكون هش وبيءكروت، بنبان كبار من بره بس احنا بنكون لسه صغيرين من جوه، وعلشان كده لما بنكبر مابنستحملش اي ضغوطات او مسئوليات زي الجواز والتربية و التحديات العادية اللي في الحياة.



و قال مثال ثاني علشان يشرح ازاى تكوين الشخصية و نضوجها بيتكونوا من بدري ، قال ان خبرات الطفولة عامله زي المياه، و كل واحد فينا عامل زي الأسفنج .طب يعنى ايه ؟

يعني الاسفنج (احنا) .. الاسفنجة شربت مياه اللي هيا مثلا (خبرات . تعليم - معتقدات) و بقت كل الاسفنجات تبان من برة شبه بعض .. صفراء ومنفوشة .. بس ياترى الاسفنجة شاربه ايه بالضبط ؟ بس

لما الضغوطات والمسئوليات (الجواز ، الخلفه ، أزمات ماديه ، وفاه حد بنحبه) بتضغط علي اسفنجك كل حد فينا، بتبدأ تطلع من الأسفنج المياه اللي جواها (الخبرات، المعتقدات) و اللي كانت متخزنه فيها.. ساعتها بس بنقول انا اتصدمت فيك ، انتي عمرك ما كنتي كده ؟؟؟ انت خدعتني و انتي ضحكتي عليا و فاهمتيني انك شخصيه ثانيه!!!!

كل دى حاجات لازم تيجي جوانا ونفضل نفكر فيها أول ما دا يحصل !



لكن فى الحقيقه كل اللي حصل اننا كنا شايفين بعض من بره طول الوقت ... و لما جت المحكات و الاختلافات ضغطت علينا فطلعت اللي كان اساسا جوانا..... يعنى طلعت اللي جوا الاسفنجك.

يعني لو الاسفنجك متخزن فيها احساس **انك قليل** ومش كفايه (الاحاسيس اللي في اسفنجك دي متخزنه من الطفولة والمراهقة).. فأول ما حد بيجي جنبك ويضغط علي اسفنجيتك شويه ..بتغضب وتترفز علشان الشخص ده قدر يطلع منك شعور انك قليل ومش مهم ..

ولو اسفنجك متخزن فيها احساس **بعدم الامان** ، فأول ما حد بينشغل عنك بتحس انك مرفوض و لوحدك وعدم الامان اول احساس بتحس بيه.



و كمل الدكتور كلامه وقال... إن العكس صحيح .. لو الشخص اسفنجيته مليانه ثقه بالنفس وأمان فصعب حد يطلع منه حاجه عكس كده .. ممكن الشخص ده لما يحس بالأهمال يتضايق ويتعب لكن مش لدرجه انه يفقد ثقته بنفسه خالص او يحس بعدم الامان.

الكلام كان لافت نظر ساره و تامرا!

وابتدا كل واحد يسرح في طفولته وايه اللي ممكن يكون متخزن
جوه الأسفنج بتاعته

اسفنجتي شاربه ايه؟

خلصت الحلقة وكل حد منهم محتار ومستغرب، وكمان رافض
انه يكون هو المشكله، او انه حتي يتحمل جزء من اسباب
المشكله.



الكلام استفزهم بس برضوا عجبهم
و بدل ما كل حد بينام كل يوم وهو متأكد انه
ضحيه الأخر ومرتاح وريح باله بإقتناعه انه
هو اللي ضحية
ابتدا كل حد فيهم يفكر في ايه اللي جوه
اسفنجته خلي بيتهم وعلاقتهم توصل
للوضع المؤلم اللي هما فيه ده؟



تاني يوم .. الصبح صحيت ساره متغيره عن اي يوم عدي عليها من فتره طويله.. كانت دايمًا بتصحى تجرجر في رجليها علشان تمشي يومها وتشوف احتياجات ولادها، لكن اليوم ده صحيت عندها شويه أمل وحاسه إن ممكن يكون فيه حل لعلاقتها بتامر.

ايه الكلام الغريب ده ؟ ايه اللي بسطها يعني؟
عارفين ليه غريب ؟
هقولكم:

بطبيعته شغلي كمشيريه للعلاقات .. كثير بقابل ناس زي ساره وتامر، جايين محبتين ومتألمين من علاقتهم بأقرب الناس ليهم .. ويببدأوا يحكو عن التعاسه اللي جواهم .. وأزاي شريكي فشل في اسعادي وكسر كل توقعاتي فيه .. وكأن الشريك دا مجرم وقاصد يعذب الطرف الثاني ..

بعد حكاوي ودموع كثيره "من ستات و رجاله" ببدأ اركز معاهم عن دور كل حد فيهم في اللي وصلوله .. وايه اللي كل حد فيهم عمله ممكن يكون وصل العلاقة للشكل دا..



وعلي فكرة .. اهم حاجه ممكن نطلع بيها هي ايه كان دوري في اللي وصلت له علاقتنا ويبداو يخرجو من الجلسات وكل واحد فيهم تفكيره شوية متغير .. بدل ما كانوا داخلين وصوابع الاتهام حاطينها في وش بعض «انت السبب» «انتي السبب» .. بيقو خارجين من المقابله صوابعهم بتشاور علي نفسهم.

طيب واياه اللي يدي امل في كده؟

اللي يدي امل .. إن التغيير اللي كانوا داخلين عاوزين يشوفوه مبقاش معتمد دلوقتي علي حد مش معنا في مقابلتنا (الشريك الاخر) ، لكن بقي جزء كبير من التغيير معتمد علينا احنا

يعني ببساطه كده **بطلنا نلعب دور الضحية**، لأن ده اصعب دور .. وطول ما انت مقتنع انك ضحية هيبقي صعب نوصل لأي تغيير او حلول.

تخيل انك حاطط سعادتك علي حد او حاجه انت ملكش سيطرة عليها ولا مسئول عنها.. فطبيعي هتبقي حاسس طول الوقت ان سعادتك مش بإيدك .. مع ان جزء كبير جدا منها بين ايديك.

وعلشان كده ساره صحيت ثاني يوم مرتاحه ومتفائله .. لأنها شافت وسمعت في الحلقة ان اسفنجتها بالمياه اللي جواها (شخصيتها بمعتقداتها و خبراتها) ممكن تكون سبب في تعاستها في جوازها النهارده .. يعني مش تامر بس اللي مسئول.. اصلا مجرد اني احس ان في خطوه معينه ممكن تساعدني في الحل .. دا يخليني سعيد

لكن تخيل بقي لو الخطوة دي انت اللي مسيطر عليها في ايدك مش في ايد حد ثاني .. يعني السعادة والامل اكبر.. سعيد ان في طريق لسه محاولتش فيه .. وسعيد كمان ان الحل تحت سيطرتي.





يعني مش تامر بس اللي مسئول .. يعني مش آدم و ليلي بس اللي تعبينا ؟ ده خلاها تحس ان بشويه أمانه مع شجاعة ممكن يكون فيه أمل

ركزوا قوي في الجملة اللي فاتت، علشان فيهم كلمتين سحريتين .. **الأمانه والشجاعة** هم مفتاح التغيير و بدايه علاج لمشكلات كثير حتي الامراض .. عارفين ليه في ناس بتشتغل وبتنجح في جوازتها و ناس تانيه لأه؟ علشان الكلمتين اللي فاتوا دول **“أمانه و شجاعه”** .



ناس كثير قابلتهم عندهم أمانه مع نفسهم وعارفين مشاكلهم كويس بس للأسف مش قادرين يعملوا حاجه فيها لأن معندهم مش اراده ولا شجاعه يحلوا .. ارتاحوا لفكره انهم لا حول ليهم ولا قوه .. اتعودوا علي نظرات الشفقه. بقوا فرحانين بالاهتمام اللي بيخده لماً يلمحوا او يقولوا انهم عندهم مشاكل في حياتهم.

في ناس تانيه بقي عندها شجاعة، وبتأخذ خطوات علشان تحل، بس أول ما تحصل مواجهه ليهم مع نفسهم ويبدأوا يشوفوا دورهم .. بيزيفوا الحقيقه وما يكملوش لانهم مش عايزين حد يحط عليهم المسئولية!!!!

احنا من واحنا صغيرين بنحب لعبه الاستغمايه، بنحب نقول خلاووويص ... لسه ...

من واحنا صغيرين لما كنا مع اصحابنا بتلعب بحاجه غلط وبابا يقفشنا و يقولنا ليه بتلعبوا اللعبه ديه؟ كنا بسرعه نقول لأه مش انا اللي قتلته نلعب، ده هو اللي قالي، و نرمي بسرعه المسئوليه علي حد تاني.



اتعودنا نهرب و ماتعودناش نتحمل المسئوليه...
ده إحنا حتي اتعودنا نتكلم بصيغه المفعول به:



بدل ما نقول انا انشغلت
 بدل ما نقول انا فقدت اعصابي
 بدل ما نقول انا بطلع زهقي في الاكل.
 بدل ما نقول انا ضعيف قدام الموبايل.

بنقول: الغربه بتقسي
 بنقول: انت عصبتي...
 بنقول: القعده في البيت بتتخن ...
 بنقول: الموبايل بيأكل الوقت ...



علشان كده كان صعب علي ساره وتامر انهم يحلوا مشاكلهم من الأول، لأن كل طرف فيهم ماتعودش انه يكون مسئول عن الحته بتاعته

ساره كانت شايفه ان تامر هو السبب في فشل جوازهم ..
وتامر برضوا كان شايف ان ساره هي السبب في اللي وصلوله من

برود وعدم تفاهم

وهكذا كانت الحياه بينهم

وعدي كذا يوم بعد ما اتفرجوا علي الحلقة اللي كانت السبب إن كل حد فيهم يقف مع نفسه ويشوف دوره في اللي وصلوله.

وجت نهايه الأسبوع يوم الخميس اللي بيكون فيه استعداد و مزاج تامر احسن كثير للمواجهات عن وسط الأسبوع.

راح لساره بعد ما نيمت أدم و ليلي وقالها محتاجين نتكلم ..
ساره فرحت وخافت في نفس الوقت.. فرحت لأن دي من المرات النادره اللي تامر هو اللي يبقي عايز يبدأ الحوار، لان في الغالب هو دايمًا بيتهرّب، و خافت ليكون دا مجرد بدايه لخناقه جديده.

ابتدأ تامر الكلام وقالها علاقتنا غاليه عندي يا ساره، وانا مضايق قوي من اللي وصلناله، جايز كل مره بنحاول نقرب و نصلح بنفسل لأن كل واحد فينا يبقي داخل بنيه تغيير الثاني وبس، بس المره ديه انا عايز ابدأ بالأسفنجه بتاعتي ..

ساره ابتسمت ووشها نور علشان فهمت إن تامر كان مركز كويس في اللي كان بيتقال في الحلقة وكمان بذل مجهود وفكر فيه، فرحت انها مش هتتلام ولا هتتعاتب زي كل مره، لقت نفسها بتسمع علشان تفهم، مش علشان ترد زي كل مره وتدافع عن نفسها، تامر عرف ياخذها لصفه بطريقته اللطيفه.





قالها بعد ما سمعت الحلقة اتشدت للموضوع، وقعدت اتفرج علي فيديوهات اونلاين للدكتور دا، واخذت خطوة و روجت قابلته، كانت خطوه صعبه عليا، أول مره اتكلم بصوت عالي في مشاكي .. ارتحت جدا في مقابلتي معاه .. وساعدني احط ايدي علي بدايه المشكله.

قالها هحكيلك و اشرحلك اكثر علي اللي اكتشفته و انا بتكلم معاه!

انا كنت الكبير في اخواتي، فكنت دايماً شايل مسئوليتهم، و كنت بحس ان اهلي بسرعه عاملوني على إني الكبير، لما بتحصل اي حاجه لـ اخواتي كنت يكون انا المسئول، واتعاب و اتعاقب .. مش بس علي تصرفاتي لكن بتحاسب علي تصرفاتهم كمان .. كنت بحس اني مظلوم بالدوره معرفتش اعيش طفولتي صح لأنني كنت دايماً شايل هم أخواتي .. و شايل هم عقاب أهلي لي لو حصل حاجه لـ اخواتي.

افتكر مره كنا في عيد ميلاد زياد ابن خالي .. و كل اطفال العيله وانا معاهم نزلنا نلعب تحت في

الجنينه اللي قدام عماره خالي.. وكان معانا اخواتي الصغيرين داليا و سامر.. المهم ماما وصتني عليهم كالعاده و قالتلي هم مسئوليتك يا تامر!

و احنا بنلعب و قعدت داليا واتكسرت إيدها .. علي قد ما كنت خايف عليها لما وقعت لانها كانت بتصرخ قوي، علي قد ما كنت في اللحظة دي مرعوب من رد فعل بابا وماما.. انه ازاي ما خدتش بالك من اختك و سبتها تقع و اتكسرت !! و فعلا اتهذئت جامد منهم و اتحزمت من اللعب بره البيت لمدى شهر.





انتي عارفه يا ساره .. وانا في المصيف كنت طول ما انا في البحر كانت لازم عنيا تبقي علي اخواتي.. مكنتش بستمع بأى لعبه أو أى حاجه بنعملها انا واخواتى من كتر خوفى لحاجه تحصلهم .. لان طبعا انا هكون السبب وطبعا هتعاقب من بابا وماما.

انا في أول علاقتي بيكي يا ساره كنت فرحان انك بتعتمدي عليا وبتثقي فيا .. لكن بعد الجواز وبعد ما زادت المسؤوليات بتاعه البيت والأولاد ابتديت احس من كلامك اني دايمًا مقصر..

وكمان كنتي دايمًا بتحسسيني ان انا المسئول عن سعادتك.. ودايمًا بتلام لو معرفتش أبسطك .. وطبعا مع الضغوط كنت بفشل احيانا اني اوصلك للسعادة اللي انتي متوقعاها .. وعلشان كذا في الاخر **احبطت ولقيت نفسي بتجنبك ..**

اه عايز اتجنبك علشان تعبت من لعب دور المسئول عن سعادته كل اللي حواليا.. لأنني كمان بقيت مسئول عن سعادتك وسعادة الاولاد بالاضافة للدور اللي لعبته من صغرى مع اخواتي ولحد النهاردة.



قررت اتمرد علي دور البطل اللي لازم يبسط كل اللي حواليه .. أسف انها جت فيكي اسفنجيتي كانت مليانه غضب من اي حد هيحاول يحسسني اني مسئول عنه، وكمان يزودها ويحسسني اني مقصر او يحسسني بالذنب.

علشان كدا وانا براجع نفسي لقيت اني انا اللي محتاج اتغير..
 مش بس في تقصيري وهروبي .. لا كمان محتاج اعرف اعبر
 عن اللي جوايا .. محتاج اقول اني تعبان لما اكون تعبت..
 ومحتاج اقول اني مضغوط لما اكون مضغوط ... ومحتاج
 راحه لما احتاجها.

انا عارف انه مش من المفروض انك تكوني بتعرفي تقري
 اللي جوايا من غير ما اتكلم .. وان من الجبن اني احط عليك
 لوحدك اللي وصلنا له .. واحسس نفسي ان انتي بس اللي
 محتاجه تتغيري.

اسف كمان مره ومن النهارده هأخذ مسئوليه الحته بتاعتي
 اللي اثرت علي علاقتنا وهبدأ بتغيير نفسي.

الدموع والفرحه ملوا وش ساره و مكنتش مصدقه
 نفسها .. حسيت إن الدنيا كلها بتضحكها وان في امل في
 بكره .. وكمان كانت فخورة جدا بتامر ومحستش للحظة انه
 صغير في عينها .. بالعكس كبر اكثر في نظرها من اي لحظة
 عدت عليهم قبل كدا.

كانت أول مره تامر يقول فيها انه محتاج يتغير..

كانت أول مره مايشوفش نفسه صح طول الوقت..

كانت أول مره يشاور علي نفسه مش علي ساره..





القصة مخلصتش لأن ده كان نص الطريق

والنص الثاني كان علي ساره

تامر بشجاعته و أمانته فتح الطريق لساره انها تشتغل علي الحته بتاعتهاهي كمان .. بس ساره كان موضوعها مش انها محتاجه تتغير وتتحمل المسئوليه زي تامر .. لاء مشكلتها كانت مختلفه خالص.

وده اللي هنقوله في (فصل الحدود)

معلومات مهم نعرفها من القصة اللي قولناها.

يعني ايه تغيير؟ التغيير يعني انك تستغني عن شئ وتستبدله بشئ تاني”
يعني انت في التغيير بتشيل فكره كانت بتحركنا لسنين وتبدها بفكره تانيه .. زي ما حصل مع تامر.



- كانت عنده فكره ان حياته كانت زي الفل قبل ما يتجوز وساره هي اللي شققت حياته .. ولما قعد مع نفسه افكر انه اصلا حياته مكانتش زي الفل وان مش سارة اللي حولته لكئيب .

- كمان كان عنده فكرة عن نفسه ان سارة اللي بتجني عليه وخته ضحية وعائش في علاقة كئيبه .. لكن في الحقيقة هو شاف انه جزء من سبب كئابة حياتهم .. لانه عرف انه عنده مشكلة .. انه كان يهرب من المسؤولية لاسباب قديمة تخصه .. وشاف ان جايز طريقة تعامل سارة مع واقع انسحابه بأنها كانت

بتلومه ودا كان بيستفزه ويتعبه جدا .. جايز هي كمان غلط في طريقة استيعابها لتقصير جوزها .. بس هو من جواه قدر يقدر انها مجرد رد فعل .. وان الفعل بادئ من عنده .. جايز هي كمان محتاجة تتغير .. بس الاكيد اني انا لازم اتغير بغض النظر عنها. وهوا دا دوري .. اني اغير نفسي مش اني اشتغل علي اتي اغيرها هيا .

طيب عارفين يعني ايه نمو او نضوج عقلي؟

يعني "ارتفاع عن سن الحدائه، ومجاوزه حد الصغر"
يعني سقف افكارك وتفكيرك يعدى افكار الطفولة او
المراهقة.

يعني افكارنا ومعتقداتنا بتاعه الطفوله اتغيرت
واتشكلت وكبرت، زي ما حصل مع تامر

زمان (سواء بمزاجه او غصب عنه) كان فاكر انه لازم
يبقي البطل بتاع اخواته والمنقذ ليهم .. لكن لما
حصل ليه نمو فكري.. فهم انه كان لازم يبطل يلعب
الدور ده مع اقرب الناس ليه حتي لو كانت مراته.



خلي بالك التغيير والنمو رحله مش محطه.. يعني مش مطلوب مننا نكون كاملين لكن علي
الاقبل نكون بنتحرك خطوات بسيطه في الطريق ده..

عارفين امتي هيكون مفيش أمل؟
يوم ما نقرر مانمشيش الطريق ده !
يوم ما نتخيل اننا مش محتاجين نتغير!
في امل طول ما احنا عندنا امانه و شجاعه مع نفسنا!
دور جواك واتغير واستمتع بالتغيير:)

تم إعداد المحتوى العلمي لهذا الكتيب تحت مظلة برنامج **«القضاء على العنف ضد النساء والفتيات وإتاحة خدمات أساسية عالية الجودة»** الذي أطلقته هيئة الأمم المتحدة للمرأة في مصر. عام ٢٠١٥، بالشراكة مع المجلس القومي للمرأة وبدعم من الوكالة الأمريكية للتنمية الدولية. وهو إحدى البرامج التأسيسية لهيئة الأمم المتحدة للمرأة في إطار المبادرة العالمية حول **«منع العنف ضد النساء والفتيات والحصول على الخدمات الأساسية لإنهائه»**. ويساهم البرنامج في تحقيق الهدف الخامس من أهداف التنمية المستدامة: **«تحقيق المساواة بين الجنسين وتمكين جميع النساء والفتيات»**، ولا سيما الغاية ٥.٢ التي تسعى إلى **«القضاء على جميع أشكال العنف ضد النساء والفتيات في المجالين العام والخاص، بما في ذلك الاتجار بالبشر والاستغلال الجنسي»**.

تم تصميم هذا الكتيب بدعم من الاتحاد الأوروبي تحت مظلة برنامج «تمكين المرأة والشمول المالي والاقتصادي في ريف مصر: الاستجابة لكوفيد١٩»

تنويه:

محتوى هذا الكتيب هو مسؤولية المجلس القومي للمرأة ولا يمكن بأي حال أن يعتبر انعكاسًا لرؤي الاتحاد الأوروبي أو هيئة الأمم المتحدة للمرأة أو الأمم المتحدة أو أي من المنظمات أو الهيئات التابعة لها.



المراجعة

أ. دينا حسين

عضو المجلس القومي للمرأة
رئيسة لجنة الشباب بالمجلس القومي للمرأة

إعداد

أ/ انجي ميشيل

ماجستير المشورة - جامعه ساوث ويست -
الولايات المتحدة الامريكية

info@ncw.gov.eg ✉

<http://ncw.gov.eg> 🌐

11 شارع عبد الرزاق السنهورى- متفرع من مكرم عبيد- مدينة نصر.
القاهرة- مصر 📍

02 23490060 📞

01007525600 📞

للتواصل مع مكتب شكاوي المرأة: 15115 📞